

**Siunnersuut uunga: Aatsitassat pillugit ingerlatallu tamatumunnga pingaarutillit pillugit Inatsisartut inatsisaat (aatsitassanut ikummatissanullu inatsit)**  
Inuussutissarsiornermut Aatsitassanullu Naalakkersuisoq

**Akissuteqaat**

(Inuussutissarsiornermut Aatsitassanullu Naalakkersuisoq)

**Aappassaaneerneqarnera**

Inatsisit atortinneqarnerannut ataatsimiititaliamut siunnersuummik tigusilluarneranut qujanaq aammalu isumaliutissiissutip suliarineqarnerani peqqissaartumik sulisimaneranut qujanaq.

Qujanarpoq inatsit suliassaqarfimmut, aatsitassanut suliassaqarfittut ittumut, namminersornermut pingaaruteqarluinnartumut tunngasoq, ataatsimiititaliap isumaqatigiittup annertuumik tapersiineranik tunngaveqarmat.

Isumaliutissiissut tunngavigalugu aammalu siunnersuutip siullermeerneqarnerani inatsisissatut siunnersuummi immikkoortut ilaanni inatsisissatut siunnersuummi aalajangersakkani annikitsunik allannguuteqartitsinissaq pisariaqartoq Naalakkersuisut erseqqissaavigineqarput. Tassani pineqarput siunnersuummi § 38, imm. 2-imi aamma § 42, imm. 2-imi aalajangersakkani allannguutit inatsisilioriaatsimut tunngasut aammalu erseqqissaataasut, allannguutissatut siunnersuummi Naalakkersuisut matumani saqqummiussaanni ilanngunneqartut.

Siunnersuutip siullermeerneqarnerani arlalinnit apeqquserneqarpoq akuersissummik peqarani aningaasarsiutigalugu aatsitassanik piiaanissamut tamanut ammaassineq naleqquttuunnersoq. Naalakkersuisut isumaqatigaat akuersissummik peqarani aningaasarsiutigalugu aatsitassanik piiaanissamut ammaassineq annertuunik misissuisarnermut nakkutilliinermullu tunngatillugu ajornartorsiutitaqartussaasoq.

Siunnersuummi § 45-imut allannguutissatut siunnersuummi isumanerluuteqarnerit taakkua aaqqiivigineqarput aammalu apeqqutit taamatuttaaq ataatsimiititaliap siunnersuummi § 45-imi aalajangersakkamut tunngatillugu saqqummiussai akineqarlutik.

Taamaattumik Naalakkersuisut iluarisimaarlugu maluginiarpaat, ataatsimiititaliap isumaliutissiissummini aappassaaneerinninnermi allannguutissatut siunnersuummi saqqummiunneqartumi, siunnersuummi § 45-imut allannguutissatut siunnersuuteqarluni inatsisissatut siunnersuutip akuerineqarnissaa inassutigigaa.

Aammattaq ataatsimiititaliap isumaliutissiissummini, annikitsuinnarmik aatsitassarsiorinissamut akuersissutinut tunngatillugu najugarisamut akileraarusiisarnermullu piumasqaatit sukannerulersinnissaannik ataatsimiititaliap kissaateqarnera naammassiniarlugu aamma allannguutissatut siunnersuummik saqqummiusseqqullugit Naalakkersuisut piumasaqarfigai. Allannguutissatut siunnersuummi saqqummiunneqartumi ataatsimiititaliap tassunga tunngatillugu kissaateqarnera aamma Naalakkersuisut akuersaarpaat.

Taamatut oqaaseqarlutik Naalakkersuisut allannguutissatut siunnersuutip akuerineqarnissaa inassutigaat.